

摘藻堂四庫全書薈要

經部

欽定四庫全書薈要

經部  
禮經會元卷四上

詳校官編修臣程嘉謨




欽定四庫全書蒼要卷一千九百八十三

經部

禮經會元卷四上

宋 葉時 撰

卜筮

 龜為卜筮為筮卜筮者先王所以使民信時日敬鬼神畏法令也洪範九疇七曰稽疑拳拳於卜筮之用先王之重卜筮可知矣此周官所以有太筮卜人也古者卜筮皆有三書曰乃卜三龜一習吉是卜用三也太卜掌

三兆之法曰玉兆曰瓦兆曰原兆其經體皆百有二十其頌皆千有二百此豈非三兆卜之制乎書曰三人占則從二人之言是筮亦用三也太卜掌三易之法曰連山曰歸藏曰周易其經卦皆八其別皆六十有四此豈非三筮之制乎案杜子春說三兆謂玉兆顓帝之兆瓦兆堯兆原兆周兆又說三易謂連山伏羲歸藏黃帝易說既非三兆亦不足據矣三兆漫不可考惟三易之名可得而辨者或曰連山神農歸藏黃帝周易伏羲

皇甫謐誌



或曰連山夏禹歸藏商湯周易文王易替連山始於艮  
歸藏始於坤周易始於乾三易之首不同於是有三正  
三統之說或者又曰伏羲始畫八卦文王始重六爻今  
三易經卦皆八別皆六十有四豈至文王而後重乎宋  
元豐中毛漸奉使契丹於民間得書有山墳形墳氣墳  
此古三墳書也山墳即連山易形墳即歸藏易氣墳即  
周易三墳為伏羲神農黃帝之書只有卦名未有卦辭  
至三代因之為易始有爻辭山墳神農書夏因之為連

山易始於艮故名連山形墳黃帝書商因之為歸藏易  
始於坤故曰歸藏氣墳伏羲書周因之為周易始於乾  
故名周易此三者皆卜筮之書周人兼而用之孔子曰  
以卜筮者尚其占是也然就卜筮而分之則筮短而龜  
長筮人曰凡國之大事先筮而後卜蓋先筮以占之而  
後卜以決之也周掌卜筮凡六官太卜為卜筮之長而  
特以太卜名開龜兆則有卜師辨六龜則有龜人共焦  
契則有巫氏皆卜官也易筮則惟筮人一人而已占人

惟兼卜筮而首曰掌占龜鄭氏謂取其長是也是以虞  
朝讓位則曰卜盤庚遷都則曰卜武王伐商則曰卜成  
王黜殷則曰卜周公營洛則曰卜言卜而不言筮其亦  
從長之謂乎嘗觀太卜有八命之名是邦事有八者之  
疑而後卜非八者則勿卜矣筮人有九筮之名是國事  
有九者之疑而後筮非九者則勿筮矣故洪範稽疑曰  
汝則有大疑謀及乃心謀及卜筮是也太卜曰大貞大  
封大祭祀大遷大師則作龜命龜貞龜筮人曰凡國之

大事則筮之又曰凡小事泣卜國事共筮是無事而不卜筮也不幾於大褻乎吁此猶先王謹微之意也一事之微則必稽之卜筮而後決是其不敢自專矣是故祭日有期而必卜祭牲可用而必卜葬兆可窆而必卜豈非欲致其誠敬之意乎或者曰凡祀大神祭大示享大鬼帥執事以卜日冬至圜丘夏至方丘之祭亦大矣卜而不吉則遂已乎曰宗伯所謂大亨大祀大祭者必旅上帝旅四望與禘太廟之祭也非常祭而卜日亦奚不

可圜丘方丘之祭必以二至豈待卜乎抑嘗考之肆師  
曰嘗之日涖卜來歲之芟獮之日涖卜來歲之戒社之  
日涖卜來歲之稼嗣歲未興美惡未萌預而卜之何邪  
曰先事而為備也春秋時鄭石臬言於子囊曰先王卜  
征五年歲習其祥祥習則行不習則增脩德而改卜石  
臬雖為征伐設言然而不吉則增脩德而改卜亦先王  
自警之意今也卜來歲於秋嘗獮社之日豈非因其卜  
之凶吉而預為備乎當此秋之嘗而預為來歲芟田荒

治之備當此秋之獮而預為來歲寇賊不虞之備當此  
秋之社而預為來歲稼穡水旱之備先時而預備思患  
而預防故太卜曰以八命者贊三兆三易三夢之占以  
觀國家之吉凶以詔救政救政者因其事而救之非徒  
卜之而遂已也雖然三卜三筮亦云足矣且有三夢之  
法占夢所掌且有六夢之占何邪曰此又天地之會陰  
陽之氣默有所交而人之精神心術皆有所感也昔高  
宗以夢而得說武王以夢而克商豈虛也哉宣王考室

考牧之詩以熊羆之夢而占男以蛇虺之夢而占女以夢魚而占豐年以夢旗而占家室則夢之有占尚矣是故致夢之法夏后氏作馬觥夢之法殷人作馬咸陟之法周人作馬三書經運皆十其別皆九十此占書也太卜又賛以八命之事以之占夢吉凶亦足以詔王而救政事矣然夢之所感有六或出於正噩或出於思寤或出於喜懼占夢乃以日月星辰占之蓋精神心術之運與日月星辰之行相交感鄭氏釋經運以為如眊視之

十輝夜有夢則晝視日旁之輝以占其吉凶此以日占  
夢之一法也月與星辰亦可以此法推之以此見夢之  
吉凶猶神於卜筮也書曰朕夢協朕卜襲于休祥古人  
之重夢如此不然占夢何以曰季冬聘王夢聘之者問  
焉而奉幣以慶之也獻吉夢于王王何以拜而受之拜  
云者受焉而屈躬以禮之也此豈先王欲神其夢而徒  
為是禮哉

史官



昔司馬遷父子為漢太史乃以文史星歷為近卜祝之間彼徒見周官太史列太卜太祝之後而在馮相保章之列故有此言爾不知周之太卜太祝太史皆以下大夫為之內史又以中大夫為之秩尊而權重矣成王封康叔乃曰太史司寇蘓公是以太史而得預司寇刑獄之事其權豈不重乎康王即位太保太史太宗皆麻冕彤裳是以太史而與公卿同服其秩豈不尊乎周書曰太史友內史友武王以太史內史為友則史職之不可

輕也可知矣今觀太史所掌六典法則即太宰之所掌者太宰以之待邦國官府都鄙之治太史以之逆邦國官府都鄙之治內史所掌八柄之法亦太宰之所掌者太宰以之詔王馭羣臣內史以之詔王治太史內史雖為宗伯屬官而其權則與大臣相掎矣法則有所辨而不信者刑之約劑有所藏而不信者刑之位常有所考而不信者誅之太史雖為史官之長而實得以刑誅百官矣法令政事會計則考逆之諸侯孤卿大夫則策命

之制祿賞罰則賛為之內史雖處史官之列而實得以祿命百官矣自漢以來史職往往見輕司馬遷為太史令且下腐刑故曰主上之所戲弄倡優畜之流俗所輕宜也周之史職有二等太史下大夫為小史等官之長一也內史中大夫為外史御史之長二也然皆以史名官則皆史也古者天子有史言則右史書之動則左史書之今太史內史等官曾無一語及天子言動之書何邪蓋記言動於既形不若謹善惡於未發垂得失於將

來不若明是非於未萌今也一居必以詔王一動必以詔王一忌諱必以詔王一納訪必以詔王是皆隨事而謹微隨時而正始其於言動之間蓋已審之熟矣及其祭祀讀禮則有書會朝協禮則有書昭穆之叙則有書四方之事則有書是又以書而正王事也豈徒載筆螭坳執簡柱下聞王言動而特書之邪其有所書者若內史有王命則書之外史有外令則書之所謂書者只此二事而已蓋內史掌書王命猶今之內制外史掌書外

令猶令之外制故內史曰凡命諸侯及孤卿大夫則策命之是策命內史掌之也外史曰若以書使于四方則書其令是命令外史掌之也御史一官掌贊書謂凡治者來受法令於冢宰則贊書之故其史有百二十人鄭氏謂若尚書作詔文非也周人制誥詔文出於內史外史非御史也或者則曰周史掌為制誥而周人之史籍何獨藏之史氏乎曰此則史官之掌也小史掌邦國之志謂諸侯邦國之圖籍文書也外史掌四方之志謂四

方蠻夷之圖籍文書也世繫昭穆之書亦掌於小史三  
皇五帝之書亦掌於小史又況邦之盟書則太史內史  
貳而藏之大比民數內史則貳之以制國用是盟書民  
數亦藏之史官也故韓宣子聘魯觀書于太史氏豈非  
以書籍為史官之所掌乎然侯國皆有史官齊之太史  
魯之史克晉之董狐史蘇史黯是也侯國皆有國史晉  
之乘魯之春秋楚之檮杌是也國史掌書國中之事以  
達於王故周禮曰凡四方之事書內史讀之可也所謂

事書者豈非如小行人利害逆順暴亂凶札康樂五書

之類乎內史讀四方事書則諸侯國史藏在史官可知  
矣漢人以郡國計書先上太史亦此意也王國之書侯  
國之志皆藏之史氏則作史非史官之職而誰歟夷攷  
周之史職自太史至御史凡七官馮相保章之掌天文  
猶星厯也內史外史之書命令猶制誥也詔王有言責  
之寄掌志有書籍之藏雖名為史而實叢是四者之職  
予以見史官之為重任矣後世置史徒知有左右言動

之記而已其地則有星臺有秘閣有諫垣有翰苑之別  
職分而意不相屬名別而事不相干成周史官之任恐  
不如是狹也

明堂

月令有春居青陽夏居明堂秋居總章冬居玄堂中央  
居太室之文說者多疑呂氏之說為妄及觀周禮有閏  
月詔王居門之文則知先王每月各有攸居順時布政  
皆於此乎出也周之祭祀四方圭幣且放其色五帝郊



兆必因其方豈於居處而獨無所取法邪蓋明堂有五  
室室有三居青陽總章玄堂太室皆明堂也王者南面  
而立向明而治故總謂之明堂匠人曰夏世室殷重屋  
周人明堂鄭氏謂世室宗廟也重屋正寢也三代各舉  
其一明其制同也案孝經周公宗祀文王於明堂明堂  
乃宗祀之地則亦為宗廟矣有明堂則有太室書曰王  
入太室裸孔安國以太室為清廟清廟亦明堂也則亦  
為太室矣月令五室所居之中皆謂之太廟則亦為太


廟可知矣古人建國左立祖廟乃在雉門之左此天子  
七廟之制而明堂乃在南門之外有五廟之寢則明堂  
非祖廟即寢廟也夏官隸僕掌五寢鄭氏以為五廟之  
寢是也又引天子七廟惟祧無廟則非矣先王先公之  
廟祧乃守祧掌之非隸僕也明堂有五室故有五寢明  
堂之名不見於周禮而見於考工記意在當時或稱為  
寢廟歟天子十二月既有常居閏月非常月則太史詔  
王居門終月說者謂聽朔於明堂門中退處路寢門中

玉藻曰天子聽朔於南門之外是明堂在南門之外每  
月則聽朔於此又曰閏月則闔門左扉立于其中彼謂  
之立是閏月聽朔則立於明堂門中此謂之居是聽朔  
而退則居於路寢門中如此則明堂與路寢門相通故  
知其為寢廟矣世室謂之宗廟重屋謂之正寢同此制  
也周禮十二月所居之制固無明文然上文曰頒告朔  
于邦國下文曰閏月詔王居門則知每月聽朔必於明  
堂而閏月則在門矣先王重告朔之禮而閏月亦謹所

居者蓋閏以正時時以序事書曰以閏月定四時成歲  
時以閏定事以閏成閏月其可不謹乎魯文公閏月不  
告朔猶朝於廟春秋書之案鄭氏註周禮曰天子班朔  
于諸侯諸侯藏之祖廟至朔朝於廟告而受行之是諸  
侯告朔于廟也魯文不視朔多矣而首於閏月書之閏  
不告朔而朝廟之禮猶講此亦餼羊存禮之意也周禮  
雖不言十二月告朔之地而獨於閏月居門之禮致謹  
焉則先王重閏月之意可見矣不然則古人制字何取

於王在門謂之閏

# 明堂圖



明堂有五室室中皆謂之太廟室皆有左个右个惟明堂在南天子南面向明而治故總謂之明堂鄭氏匠人註云木室東北火室東南金室西南水室西北非也

# 繫世

繫世之書重矣天子有帝繫諸侯有世本繫世不定則親疎何由而別昭穆何由而叙同姓異姓庶姓何由而辨乎商之祖也以契周之祖也以稷此亦可以定其帝繫之所從出也太伯之後為吳胡滿之後為陳此亦可以定其世本之所自来也然周人繫世之奠必屬之春官一諷之瞽矇一奠之小史厥有旨哉小史掌讀禮者也讀禮而掌奠繫世則教以禮之序瞽矇掌誦詩者也

誦詩而掌世奠繫則教以樂之和序故有別和故有親  
有別則昭穆不相亂有親則親疎不相離周人定繫世  
之意蓋如此豈徒原本繫之有遠近取闕閱之有高下  
而已哉司馬遷作史記推帝劉之繫出於唐是帝繫猶  
有可考也叙司馬氏之元出於重黎是世本猶有可稽  
也蓋司馬遷世為太史氏小史掌定繫世乃太史之屬  
故采世本而作史記明周譜而著世家是其繫世之書  
至漢猶存邪然嘗讀尚書正義孔氏案帝繫云黃帝生



昌意昌意生顓帝顓帝生窮蟬窮蟬生敬康敬康生勾

芒勾芒生螭牛螭牛生瞽瞍瞽瞍生舜又案帝繫及世

本云黃帝生玄囂玄囂生僞極僞極生帝嚳帝嚳生堯

此繫世之書至後世猶存焉孔氏又曰案世本堯是黃

帝之孫舜是黃帝八代之孫堯女於舜之曾祖為四從

姊妹以之為妻於義不可世本之言未可憑信如此則

後世所謂繫世之書非小史所纂瞽瞍所諷之書矣後

世之繫世不明獨有氏族志存焉爾然自小史之職廢

瞽矇之官缺繫世既不復明則昭穆失其序親疎失其和而本支之所從出者已不可得而辨雖有氏族誰知氏族哉夫樂樂其所自生禮不忘其本瞽矇諷而誦之則人知其生之有可樂小史奠而序之則人知其本之不可忘先王習民於和序之教而陶民於忠厚之風繫世之功多矣不然何以隸之禮官樂官之掌邪

名諱

小史曰有事則詔王忌諱王制亦曰太史執簡記奉諱

惡小史太史之屬故奉諱詔諱之職同夫周人以諱事  
神名終將諱之此左氏之語也然達孝莫如周公周公  
作周禮名苟可諱則周公知所避矣今考之周禮文王  
名昌而醯人亦曰昌本康鷩武王名發而小行人則曰  
時聘以發四方之禁周公名旦雞人曰掌呼旦以詔百  
官是猶曰君前不自諱也成王名誦大司樂曰興道諷  
誦言語揮人曰誦王志瞽矇曰諷誦詩甚至官名謂之  
誦訓胡為而亦不為君諱乎由是而觀之則周人以諱

事神之說左氏之語誣也不思文王名昌武王名發而詩曰克昌厥後駿發爾私周人不諱於詩矣魯莊公名同襄公名午而春秋曰同盟於幽陳侯午卒孔子不諱於春秋矣漢儒記禮乃曰詩書不諱臨文不諱廟中不諱嫌名不諱二名不偏諱亦知其諱之非而廣為是說爾孟子諱名不諱姓之語毋亦為人子者不忍自斥其父祖之名而他則未嘗諱也然則太史之奉諱惡小史之詔忌諱果為何事邪曰此則如地官誦訓所謂掌道

方慝以詔辟忌之類是也人君行事當知就善而避惡  
即吉而忌凶所謂忌者非謂忌日也君子有終身之憂  
故忌日不樂此則孝子慈孫之心尚何待於小史之詔  
彼鄭康成徒見忌諱之文屬於繫世昭穆之下故以死  
日為忌名為諱豈知王之所謂諱惡者以惡事之當諱  
避爾小史之所謂忌諱者其亦諱惡忌避之義歟自此  
義不明後世乃有以諱而易人之名者以諱而易人之  
姓者漢史之書蒯徹為通莊周為嚴是也嫌名而諱荀

卿為孫是也二名而諱世民為人是也甚至諱惡益繁  
辟忌愈衆有廣行之諱有梁山壞之諱愚者違禮以為  
孝諂者獻諛以為忠吾恐周公孔子之愛君父不如是  
之屑也故因小史之詔忌諱而為是論以祛漢儒之惑  
而明周禮之疑以附韓文公胡定公之辯

天文

太史內史皆史也馮相氏保章氏何以列於史官之中  
案春秋傳曰楚有雲如衆赤鳥夾日以飛楚子使問諸

周太史則是太史固司天道矣月令曰太史守典奉法  
司天日月星辰之行是以司天日月星辰為太史之職  
然則馮相保章氏不屬之太史而屬之何官邪二官皆  
稱氏以其有世功則以官名氏猶重黎之世序天地也  
掌天文而世其官猶有廢時亂日如夏仲康之羲和者  
況不世乎馮相氏曰掌歲月日星之位而辨其叙事以  
會天位保章氏曰志星辰日月之變動以觀天下之遷  
辯其吉凶以二職考之馮相氏則司天文之常保章氏

則司天文之變者也司其常以辨叙事所以敬授人時  
司其變以詔救政所以克謹天戒自子丑至戌亥十二  
歲也自孟春至季冬十二月也自亥枵至娵訾十二辰  
也自甲乙至壬癸十日也自角亢至翼軫二十八宿也  
周天三百六十五度四分度之一歲日月星辰之行俱  
不失其度是之謂會天位而可以為時事之候冬至日  
在牽牛景長三尺長至也夏至日在東井景長五寸短  
至也日者實也必於長短極時致之故以冬夏致日春



分日在婁月上弦於東井圖於角下弦於牽牛秋分日  
在角月上弦於牽牛圖於婁下弦於東井月者闕也必  
以長短中時致之故以春秋致月日之長短月之盈闕  
以四時致之罔有差忒是之謂辨四時之叙而可以為  
時叙之期此馮相氏之辯叙事者以此也天位得其會  
四時得其叙固天文之常或者人事未脩天理未得而  
有日月星辰之變動保章氏因以辯其吉凶又以星土  
之分而觀妖祥以歲星所居而觀妖祥以五雲之色而

辯吉凶之祲象以十有二風而命乖別之妖祥且如星  
見大辰梓慎知宋之將火此以星土觀妖祥也歲紀玄  
枵裨竈知楚子之將死此以歲相觀妖祥也梓慎望氛  
而知宋鄭之多喪則以雲而辨其吉凶矣師曠歌風而  
知楚師之無功則以風而命乖別矣此保章氏之詔救  
政者以此也叙事者馮相之常救政者保章之變以保  
章之詔救政而訪馮相之叙事以此見保章之於馮相  
其職實相通也不惟此爾太史正歲年以叙事是定四

時以叙授人時之事今保章氏之訪叙事以人時為重則其叙事又與太史通也然而吉凶妖祥保章掌之足矣眡祲一官掌十輝之法亦以辯吉凶觀妖祥乃以列之卜祝之間何邪蓋星史卜祝職本相通古者設官分職其於吉凶妖祥之事若是拳拳而不敢忘者為備故也一則曰觀妖祥二則曰辯吉凶以此見保章之於眡祲其職又相通也至於太卜贊三卜三筮三夢之占以觀國家之吉凶而亦曰以詔救政今保章之詔救政見

天象而先為之備則其救政又與太卜通也或者則曰周官吉凶妖祥之占曰訪敘事曰詔救政足矣有如日月之眚非細故也胡為有救日月之鼓又胡為有救日月之弓矢此何益於救災之政邪蓋先王克謹天戒人臣克有常憲非不知鳴鼓張弓無補於日月之救然亦不忍坐視薄蝕而不之救也至如大哉大變則不舉大哉大變則弛樂大荒大哉則素服亦非徒具虛文也其所以脩身恐懼思答天戒者無所不用其極也豈徒區

區桴鼓弓矢之救而已哉後世之君不惟叙事不訪救  
政不詔至於救災之禮亦不復講孔子作春秋故於日  
食之變必詳記而備錄之以戒人君遇災而不知懼也  
間有伐鼓用牲又違其禮聖人屢致意焉然猶愈於坐  
視而不之救也他如恒星不見星隕如雨星孛入斗星  
孛東方之類此皆天文之變者而時君世主恬不之畏  
毋亦馮相保章之職不舉歟

### 分星

分野之疑何如乎曰二鄭之釋周禮也案大司徒曰以土宜之法辯十有二土之名物康成以為十二土分野十二邦繫十二次各有所宜保章氏曰以星土辯九州之地所封封域各有分星司農引春秋傳曰參為晉星商主大火國語曰歲之所在則我有周之分野是也康成則曰今其存可言者十二次之分也此分野之辯所以紛紛而不一歟自時厥後或以十二州配之或以列郡配之或以山河兩界配之或以七星主九州

後天文志劉昭

或以七星主七國

晉志

或繫之二十八宿或繫之五星紛

紛異論是以學者多疑焉主分野之是者則曰自柳九  
度至張十六度為鶉火之次當周之分武王克商歲在  
鶉火伶州鳩曰歲之所在則我有周之分野則周屬鶉  
火可知自畢十二度至東井十五度為實沈之次當晉  
之分晉文即位歲在實沈董固曰實沈之次晉人是居  
則晉屬實沈可知自張十七度至軫十七度為鶉尾之  
次當楚之分魯襄公二十八年歲淫於玄枵而裨竈知

楚子之將死且曰歲棄其次而旅於明年之次以害鳥  
帑周楚惡之說者謂帑鳥尾也則楚屬鶉尾可知自氏  
五度至尾九度為大火之次當宋之分昭公十七年星  
見大辰而梓慎知宋之將火且曰宋大辰之墟鄭祝融  
之墟也皆火房也說者謂辰大火也則宋屬大火可知  
此則分野之說為不疑矣辨分野之非者則曰吳越南  
而星紀北齊東而玄枵北衛東而娵訾北魯東而降婁  
西周宅中土而柳星乃位於南以柳星為周可乎秦在



西北而井鬼乃在乎西南以井鬼為秦可乎觜參在西  
魏在東北以觜參為魏可乎角亢東宿鄭在滎陽而屬  
於角亢可乎昴畢西宿趙居河朔而屬於昴畢可乎又  
曰牛女北也史記謂之揚州虛危北也史記謂之青州  
昴畢西也史記謂之冀州奎婁西也史記謂之徐州魏  
冀州之國也晉則不屬於冀而屬於益魯兗州之國也  
魯則不屬於兗而屬於徐此則分野之說為可疑矣然  
略分野之說而不信則周禮不應有星土之辨拘分野

之說以為驗則左氏未免有傳會之誣更以左氏考之

無冰之灾何關於立枵星紀而梓慎以為宋鄭之饑二

十八年日食之變何與於豕韋降婁而士文伯以為魯衛

之惡昭七年星紀果同為吳分則吳亦得歲史墨何以謂

之越得歲而吳伐之必受其凶昭三十二年參墟果為晉分

則實沈為星子產何以謂之高辛之子而能為晉侯之

崇昭元年此又左氏之說又不足信也又以史冊觀之四

星聚牛女而晉元王吳四星聚觜參而齊祖王魏彗星


掃東井而符堅亡秦景星見箕尾而慕容德復燕此又分野之驗而未可以盡略之也蓋星土分星本不可以州國拘也且以職方氏言地理必指其東西南北之所在山鎮川澤之所分民畜穀利之所有獨於天文之紀如司徒只言十有二土未嘗斥言其所應者何次保章氏言星土辨九州之地不明言其所辨者何星是星土分星不可以州國定名亦明矣愚以保章觀之隨其土之所屬應其星之所臨故謂之星土辨九州之地非如

鄭氏言十二邦繫十二次也隨其國之所封屬其星之所在故謂之所封封域皆有分星亦非如賈氏言受封之日歲星所在國屬焉夫九州上應星土則三百餘度皆有其驗豈特十二次而已乎封域皆有分星則千八百國皆有所屬豈特十二國而已乎九州之土皆配星九州之國皆有分故因其星可以辨其州之地因其分可以觀其國之妖祥保章氏之說如是而已說者何必牽合傳會而定指後世郡國之名以求配之也昔孔子

作春秋日食隕星之變無所不記豈必皆周魯之分而後言之乎五星聚東井漢入秦之應也崔浩嘗言其不在十月司馬公作通鑑乃棄之而不取而歐陽志唐天文凡日食星孛之變一一記之而獨不言其事應亦豈拘拘於分野之說哉大抵周官所辨者欲以觀妖祥爾天子之所觀者九州也諸侯之所觀者一國也諸侯以一國分星而驗一國天子以九州星土而辨九州諸侯觀一國之妖祥而為一國之備可也天子可以諉之一


國分星之所屬而不為之救政序事乎知乎此則可以  
言星土分星之說矣

# 分星圖



案大司徒只言土宜辨三土不言所辨何次保章只言星土辨九州不言所辨何星又言所封之域皆有分星亦不言其何分也康成以春秋時十二國分配十二次恐未必然今此圖不指定九州分配某星只案職方氏所言九州東西南北自有定界觀九州地界之所抵則星之所辨亦畧可觀矣

# 分星舊圖





# 車旗

車旗所以彰德而辨等藏禮而正名一毫不容僭越也  
巾車掌車司常掌旗二職雖分而實通故其官相聯案  
巾車曰掌公車之政與其旗物而辨之則車旗之職通  
矣蓋王與王后之路有等而孤卿大夫士庶人之車亦  
有等王與諸侯之旗有名而卿大夫士師州里縣鄙之  
旗亦有名名物之頒等級之敘章其有德之別而禮存  
焉此巾車司常所以屬於禮官也且以路車言之玉路

大路也大馭馭之金路綴路也

依孔安國說

一名齊車齊僕

馭之齊右前之象路先路也一名道車道僕馭之道右

掌之木路亦次路也一曰旂車田僕馭之革路戎路也

一名戎車戎僕馭之戎右掌之玉路木路無右者鄭註

云齊右與僕齊同車有祭祀則兼玉路之右然則戎右

兼田右歟此王之五路也重翟后從王祭祀所乘厭翟

后從王賓諸侯所乘安車朝見於王所乘翟車王后出

乘所乘輦車后居宮中所乘內司服掌后六服而三服

以翟為飾巾車掌后五路而三車以翟為飾豈非取其文明歟然周禮不言后車之用鄭氏約五路而言之玉路以祀金路以賓象路以朝故鄭氏以三翟車當之此  
后之五路也至於孤卿大夫士庶人之車謂之服車五  
乘言服事之所乘也巾車不言公侯伯子男之車者以  
其服下王一等則其車亦下王一等也金路繁纓九就  
則上公金路矣象路七就則侯伯象路矣革路五就則  
子男革路矣攷之巾車曰金路同姓以封象路異姓以

封革路以封四衛木路以封蕃國此四路之用有同異  
內外之別也以詩觀之采芑曰路車有奭鉤膺倬革者  
方叔也嵩高曰鉤膺濯濯路車乘馬者申伯也韓奕曰  
鉤膺鏤錫乘馬路車者韓侯也三者皆非同姓而得乘  
金路矣豈非詩人所言以上公以九為節得乘金路侯  
伯以七為節當乘象路而巾車所謂以封者乃其賞賜  
之特恩而非所乘之制歟春秋傳曰武王封魯衛唐叔  
以大路杜預謂金路也王之大路曰玉路諸侯之大路

曰金路此則以封同姓之車也又以旗常言之日月為常王建之蛟龍為旂諸侯建之通帛為旛孤卿建之雜帛為物大夫士建之熊虎為旗師都建之鳥隼為旟州里建之龜蛇為旐縣都建之全羽為旞道車載之析羽為旌旂車載之此司常頒旗物之名也巾車曰玉路建大常金路建大旂象路建大赤革路建大白木路建大麾鄭註曰大赤周之正色大白殷之正色大赤通帛之旛大白雜帛之物大麾不在九旗之數愚按禮記言行

前朱雀而後玄武左青龍而右白虎今五路所建既有  
日月之常此必中央所建之旗矣蛟龍為旂安知大旂  
非左青龍乎鳥隼為旗安知大赤非前朱雀乎龍虎為  
旗安知大白非右白虎乎龜蛇為旐安知大麾非後玄  
武乎此巾車敘旗物之名也然司常言國之大閱贊司  
馬頒旗物而司馬教治兵言王載太常諸侯載旂與此  
同其他則否此言孤卿建旛彼則師都載之此言大夫  
士建物彼則鄉遂載之此言師都建旗彼則羣吏載之

此言州里建旗彼則百官載之此言縣鄙建旒彼則郊  
野載之此言載旒載旌而司馬又闕之蓋司常主大閱  
而言司馬主治兵而言大閱大禮也孤卿大夫士與鄉  
遂采地之大夫咸在師都將都縣之兵州里縣鄙將鄉  
遂之兵此師都所以有旗州里所以有旗縣鄙所以有  
旒孤卿大夫士則從王爾所以建旌建物也治兵常禮  
也孤卿大夫士未必盡出其所從王者百官也命卿之  
為軍吏者也采地鄉遂之兵皆屬於命卿故雖師都不

過載旛鄉遂不過載物至於郊野載旒特以采邑大夫將采邑之兵不屬乎命卿故也此其所載之旗或有不同歟故於司常司馬互言之也道車象路旂車木路此王路之所載故司馬闕之而與巾車所建之旗亦不同也然路車則有繁纓旂常則有旂案巾車玉路樊纓十有二就太常十有二旂自此降殺以兩金路九就大旂九旂象路七就大赤七旂革路五就大白五旂木路則當三就大麾則當三旂可知矣鄭氏謂不言就與革路



同非也考工記又曰熊旗六旂龜蛇四旂亦非也典命曰上公九命宮室車旗衣服皆以九為節侯伯七命以七為節子男五命以五為節三公八命卿六命大夫四命公之孤四命卿大夫士三命再命一命皆可以是推之郊特牲乃云大路樊纓一就先路三就次路五就毋乃惑於漢儒事天尚質之說歟不思司常言大路以祀非祀天乎玉路一就則大常亦可一旂矣郊特牲又曰旂十有二旂龍章而設日月則旂常之制又皆無辨矣

尚何足信哉周人以大裘祀天而漢儒謂裘冕無旒周人以大路祀天而漢儒謂路纓一就如此四圭尺有二寸以祀天胡亦不降而為一寸乎儒者欲明衣服車旗之制要當以周禮為定

兵政

大宰人知其掌治也司徒人知其掌教也宗伯人知其掌禮也司馬治軍掌兵也今乃言掌邦政而不言兵政正也以正而帥不正也不得已而用兵則有征而無戰

征之為言正也亦以正天下之不正者歟易曰師衆也  
貞正也能以衆正可以王矣剛中而應行險而順以此  
毒天下而民從之夫師出於正而猶曰毒天下蓋才說  
用兵便未免一毒字兵豈先王所樂用也哉是故司馬  
一職首以建邦九法以佐王平邦國平之所以使正也  
正以畿國使固封域等以儀位使安分守作以功賢使  
勉事功牧監以使之相維軍禁以使之相糾任之以職  
貢則無曠土用之以簡稽則無遊民均守平則使尊卑

不得以相踰比小事大使小大不得以相陵如是則天下無有不正者矣于斯時也諸侯猶有違命者有憑陵暴犯盜賊者有放弑賊殺亂行者有負固不服犯陵不循荒散不治者則不得已隨其罪之小大輕重而以九伐之法正之伐而言正豈非以上伐下而有正之之義邪觀此則司馬雖曰掌兵而未嘗明民以用武也又況軍藏於六鄉而弗謂軍將藏於六卿而弗謂將以蒐田獮狩而隱其振旅芟舍治兵大閱之名以比閭族黨州

鄉而易其伍兩卒旅師軍之名以井邑丘甸縣鄙而晦  
其車馬甲士步卒軍賦之名以軍伍而會於教官之司  
徒以軍禮而掌於禮官之大宗伯以大軍禁而徇於刑  
官之士師司馬雖有統兵之職拳拳於政象之垂汲汲  
於政職之施而於兵政若不敢專焉以至軍司馬輿司  
馬行司馬雖有其名而無其職則先王不樂用兵之意  
槩可知矣大抵先王以天下之不可去兵於是乎有治  
兵之法以武事之不可明民於是乎有寓兵之意四時

有田則教兵不為不先六卿皆將則蓄將不為不豫尚  
何待刻畫兵號而明示之以毒天下之具哉是故徒役  
可盡起而所調惟一人鄉遂皆為兵而所制惟六軍先  
王不忍用兵之意已見於此愚故因小司徒之令賦而  
知先王之不忍用民因大司馬之掌政而知先王之不  
不樂用兵

將權

大司馬制六軍則兵屬大司馬矣至於軍旅大事則五

官預有事焉冢宰掌政典是政與司馬通也宗伯掌軍禮是禮與司馬通也司寇掌軍刑是刑與司馬通也司徒一職乃統六鄉六遂之民六軍之所自出也故大軍旅大田役司徒以旗致之則民與司馬之軍通矣司空雖不可考然鄉師大役帥民徒而至以考司空之辟以逆役事則司空與司馬相通可知然此特六官預執事於軍旅爾大司馬曰凡制軍萬有二千五百人為軍王六軍軍將皆命卿則是六軍軍將皆六卿為之也且如

有扈之師六事咸在牧野之戰三軍並行皆將也豈特預執事而已哉蓋古者寓兵於農寓將於卿愚於軍賦嘗言及此矣然古人命卿為將此有事之時也無事而統兵亦不專屬之司馬不欲其權之專屬一人也嘗考之書大保命仲桓南宮毛俾爰齊侯呂伋以二千戈虎賁百人逆子釗齊侯司馬掌兵也非有宰臣之命則不敢一擅發召公冢宰制命也非有二卿將命以往則不得以專行此則守衛之兵權不專屬於一人也又觀之



詩王命卿士南仲太祖太師皇父整我六師王謂尹氏  
命程伯休父左右陳行戒我師旅程伯司馬出征者也  
非有尹氏之命則不得以戒旅尹氏世大夫出令者也  
非有卿士王命則不得以整師此則征伐之兵權不專  
屬於一人也古者兵無專將將無專權觀此亦可見矣  
是故周人制兵之法國子宿衛之士則屬之冢宰虎賁  
宿衛之兵則屬之司馬師保四翟之隸既屬之地官又  
屬之秋官至如國有大事國子游倅雖屬於夏官之諸

子而又弗征於司馬其衛兵之權散出可知也鄉遂之民皆軍也則屬之司徒四時之田皆兵也則屬之司馬閭師地官之屬軍旅之戒則受法於司馬至於鄉師帥民徒而致政令受役要可也而必致辟于司空其畿兵之權散出可知也蓋古兵制自衛民之外六軍之制皆寓兵於農本無兵之可統寓將於卿本無將之可名又況兵權散出不專屬之一人有事調兵則天子遣使一牙璋發之其權又屬於天子是以兵滿中外居然若無

迨及數世司馬世官爰以命氏馴至諸侯更伯列國專  
征世卿帥師大夫藏甲孔子作春秋凡書帥師譏權臣  
也聚民而為兵則兵安得而不惰聚兵而專將則將安  
得而不驕此其為患也久矣唐人府兵號為得井田大  
意然井田寓兵於農府兵寓農於兵其意已異而況兵  
有定額將有定負更番再世安能無將驕卒惰之患府  
兵且爾而況不為府兵者哉

# 師田

王制曰天子無事則歲三田一為乾豆二為賓客三為  
充君之庖若然則田獵特為三事講也今觀大司馬四  
時之田皆因田而講武豈徒為賓客庖豆之奉而已哉  
蓋王制特為獲禽設也非為講武言也周禮非區區於  
獲禽而實拳拳於講武也然知古人因田事而講武而  
不知古人因武事而寓田講武本非古人之得已而殺  
禽亦豈古人之本心哉古人不以無事而講武亦不以  
無事而殺獸是以因振旅芟舍治兵大閱之教而寓蒐

苗獮狩之儀因蒐苗獮狩之田而為社祫禘烝之祭如此則講武為有名而殺獸為有禮也且成周田獵之制見於地官如大司徒則以旗致民小司徒則會卒伍以作田役鄉師則前期出田法簡其鼓鐸兵器脩其卒伍州長則帥民而致之黨正則作民而治其政事族師則合其卒伍簡其兵器以鼓鐸旗物帥而至縣師則受法於司馬作其衆庶牛馬車輦會其卒伍旗鼓兵器帥而至遂人則作野民帥而至遂師則平野民縣正則用野民帥而至稍人則

以縣師之法作其同徒輦輦帥而至以聽於司馬鼓人則掌六鼓四金以正田役司常則贊司馬頒旗物及致民置旗弊之此田獵致民之禁令見於他官者然也山虞則萊山田之野及弊田植旗于中致禽而珥焉澤虞則萊澤野及弊田植虞旌以屬禽迹人則掌邦田之地為厲禁而守之牧師則贊焚萊獸人則時田守罟及弊田令禽注於虞中小宗伯則帥有司而饁獸于郊遂頒禽肆師則四時田獵祭表貉則為位甸祝則致禽于虞

中乃屬禽及郊饁獸舍奠于祖禰乃斂禽田僕則設驅  
逆之車小子則斬牲左右徇陳此田獵致禽之禁令見  
於他官者然也成周田政必分掌於六官之屬以其皆  
預田也而四時教法則大司馬實總之是以仲春而教  
振旅平列陳辨鼓鐸鐃鐃之用遂以蒐田祭社仲夏而  
教茷舍撰車徒讀書契辨號名之用遂以苗田以享禘  
中秋而教治兵辨旗物之用遂以獮田以祀祊中冬而  
教大閱則合三時之所辨者而皆辨之遂以狩田以享

然此則大司馬因講武以寓田因致禽以脩祀其禮然也然四時之田鼓鐸鐳必皆備旗物號名必皆舉今三時各辨其一而不辨其二則何以令六軍乎曰四時之田無不辨而隨時所教各有所主每於一事加詳焉故迭言之而實皆辨也或者則曰春蒐夏苗秋獮冬狩雖云農隙以講事然古者寓兵於農農民趨事赴功析因夷隩各順其時少有隙暇亦欲自休息也今以四時而講武使民奔走服役之不暇將恐春不及耕夏不及



耘秋不及收冬不及藏終身擾擾而不得休息豈先王

使民之政乎大抵成周制軍其於六鄉六遂之民本不  
盡用也雖曰田與追胥竭作必隨遠近之地而遞征之  
何嘗一一盡致於司徒而聽教於司馬也辨鼓鐸則有  
諸侯將軍師帥旅師卒長兩司馬公司馬之屬辨號令  
則有羣吏百官帥家縣鄙鄉野之屬辨旗物則有諸侯  
羣吏帥都鄉遂郊野百官之屬四時必隨其地之遠近  
帥屬而遞教之矣大司馬於四時之田亦姑總其大綱

言之耳如此盡舉畿內之民而教之吾恐所由之野四表相去才三百五十步爾雖容百官且不足況六軍乎都鄙去王城五百里雖一年調發且不可況四時乎雖然亦觀先王教兵致禽之意可也凡師出曰治兵入曰振旅草止則曰芟舍簡兵則曰大閱今以仲春而教振旅則是教民之始而已為還兵之期以此見先王之不樂用兵也特以戰不可以雖安而忘民不可以不教而戰由是乎有四時之教然芟舍則曰如振旅治兵則曰

如振旅雖曰坐作進退疾徐疏數之節皆如振旅之陳而不用兵之意已默寓乎其中矣凡田搜擇取獸曰蒐為苗除害曰苗獸多可殺曰獮圍守不釋曰狩今以中春而行蒐田則是致苗之始已有愛物之心以此見先王之不忍殺獸也特以兵不可以無名而習田不可以無事而講於是乎有四時之田然夏苗則曰如蒐秋獮則曰如蒐雖曰有司表貉誓民鼓遂圍禁皆如蒐田之法而不殺獸之仁已迭行乎其間矣觀此則講武豈先

王之得已而殺獸豈先王之本心哉

禮經會元卷四上

謹案第二頁前四行豈至文王而後重乎刊本至訛止重訛傳今並改

第二頁後四行以卜筮者尚其占是也刊本卜占二字互訛據易繫辭傳改


第二頁後五行凡國之大事刊本國訛卜今改第六頁後三行內史所掌八柄之法刊本史訛宰

據周禮改

第十四頁後二行誰知氏族哉刊本知訛有今改

第三十八頁前七行則有諸侯羣吏帥都鄉遂郊  
野百官之屬刊本帥訛師今改





覆校官編修臣茅元銘

校對官檢討臣龔大萬

騰錄監生臣杜成

欽定四庫全書薈要

經部  
禮經會元卷四下

詳校官編修臣程嘉謨






欽定四庫全書薈要卷一千九百八十四

經部

禮經會元卷四下

宋 葉時撰

功賞

春官內宰稽功會食則制祿食必視功夏官司士以功  
詔祿則頒祿秩必視功至如小宗伯衣服車旗宮室之  
賞賜鄭氏亦云王以賞賜有功則是車服宮室之賞必  
視功也而況司勳六卿賞地之法如載師所謂賞田者

賞之以土地可不旤其功以為輕重乎司勲所謂功者何如哉王功曰勲以其定策立之功有勲於王者也國功曰功以其建邦設都有功於國者也民功曰庸為民興利而有不窮之用故曰庸事功曰勞奉公從事而有勲勞之績故曰勞治功曰力以其有治理効之力戰功曰多以其効首虜之多此六者特隨其事而殊其名視其功而異其等耳總而謂之功鄭氏以伊周禹稷臯陶韓信之功比之則拘矣功有六等則賞法必有六等功

之大者賞必重功之小者賞必輕故曰凡賞無常輕重  
祇功司勲之賞無常猶司勲之賜無常也蓋以德詔爵  
則爵有常品以功詔祿則祿有常秩以能詔事則事有  
常職以久奠食則食有常廩惟賞賜出於人君非常之  
恩如冢宰所謂匪頒如玉府所謂賜予皆一時之特恩  
苟有常額而無輕重多寡之裁則人人可以僥倖而得  
之矣今司勲所掌者賞地之法也猶詩所謂錫之山川  
土田附庸者也以地賞有功亦如采地之制必有稅法

載師賞田在遠郊之地其稅二十而三今日凡頒賞地  
三之一食三分其地王食其一而受賞者食其二是十  
而稅三也又何倍於賞田之稅乎案載師曰賞田此言  
賞地又曰惟加田無國正是田以實數言而地則不止  
為田亦如司徒封疆之謂爾故其言稅不同與賞地之  
稅雖倍而如田無正安知其不為二十而二也然此特  
賞地之法爾而先王報功之意豈特錫以土田而遂已  
哉凡有功者必銘于王之太常祭之大烝是先王念功

之意不忘也生則銘書於太常如書所謂服勞王家厥  
有成績紀于太常是敬之如日月也死則祭於大烝如  
書所謂茲予大亨于先王爾祖其從與享之是敬之如  
祖宗也先王報功既賞之以地又銘之以旂又享之以  
祭其拳拳念功之意蓋將與國咸休相為終始豈若後  
世書券之符方剖而菹醢之誅已隨圖繪之象未形而  
赤族之禍已慘吁司勲賞地之法固已不敢望報而司  
寇功辟之議亦豈無可宥者哉然司勲猶今吏部司封

司勲之職宜以屬天官也否則掌六鄉之賞地宜以屬地官也今以屬之夏官司馬之後何邪蓋六功雖以戰功居其末然人之蒙霜雪冒矢石出萬死一生之地而甘心不辭者為國家衛社稷爾其功不亦多乎先王用兵行師首以功賞為重甘誓有用命之賞鳴條有從誓之賞牧野有功多之賞出師無功何以為社稷之衛有功不賞何以為士卒之勸司馬法曰軍賞不踰旬如屬之地官則司存散隔文告回復而壅底之患生況有害

功者乎馮唐言李牧為將賞賜決於外不從中覆乃能  
成功魏尚以上功差首虜六級而文吏以法繩之其賞  
太輕則非所以用將由此觀之戰功之賞猶為急也周  
人固無害功之事而周公為後世慮故以司勲繼司馬  
之後厥有旨哉

### 馬政

夏官制軍而以大司馬名官其次有軍司馬輿司馬行  
司馬其下有公司馬兩司馬又其外有都司馬家司馬

設官命名皆曰司馬豈非軍政以馬為重乎成周六軍之賦不知用若干馬考之稍人掌令丘乘之政若有會同師田行役之事則以縣師之法作其同徒輦輦帥而至治其政令以聽於司馬案縣師若有軍旅會同田役則受法於司馬作其衆庶及馬牛車輦會其居人之卒伍此司馬頒法於縣師而稍人則以縣師之法帥而聽於司馬也縣師掌邦國都鄙郊里地域稍人乃掌甸稍之人受司馬之法令丘乘之政則是法通行乎王畿侯



國矣然則丘乘之政車馬之賦也鄭氏讀乘為甸非也  
彼徒見司馬法曰甸出長轂一乘馬四匹以為車乘非  
丘所供也不知司馬法言甸出一乘調兵之數也周禮  
言丘供一乘畜兵之數也畜之多所以存武備調之寡  
所以優民力況司馬法未必周制也何必於丘乘而疑  
之乎丘十六井一井八家共百二十八家共出車一乘  
馬四匹成周軍賦不可得見獨稍人丘乘一法可得而  
推之丘出一乘則甸當四乘縣十六乘都六十四乘共

二百五十六匹馬矣以六鄉計之萬二千五百家約出  
四百匹馬六鄉約得二千四百匹馬矣或者則曰魯作  
丘甲聖人譏之以其賦役之重也今令丘出車一乘馬  
四匹得無甚於丘甲乎蓋成公作丘甲者令一丘之家  
皆為甲士盡數調兵也立乘之法畜之而非盡調也鄭  
氏亦曰凡用役者不必一時皆徧以人數調之使勞逸  
遞焉然則丘乘必有遞征之法也況軍政以馬為重令  
六鄉所出僅二千四百匹爾亦豈為多馬乎先王寓兵

於農故亦藏馬於民特設馬質一官繼於司馬之後使  
之為民平馬價之高下而使民自畜馬一以為戎馬軍  
旅用之一以為田馬田役用之一以為駑馬給役用之  
田戎分為二物則其遞征可知矣校人謂駑馬三良馬  
之數則此駑馬當亦如之鄭氏以此三馬為給官府之  
役則非也曰受馬於有司者謂有司買其馬以授民也  
馬死則甸內必買馬以代之恐其久而缺備也甸外則  
入馬耳於有司恐其久而無信也更以其物欲其如本

色也其外則否謂馬之難同則不必如本色也惡馬則  
網之所以調馬性馬行則齊之所以寬馬力有以馬爭  
訟者則馬質聽之禁原蠶者欲其馬息之蕃也案鄭氏  
曰天文辰為馬蠶為龍精是馬與蠶同氣物莫能兩大  
禁原蠶者為傷馬歟凡此皆所以教民畜馬之政也至  
如校人所掌之六廐所辨之六種所養之十二閑則王  
馬之政也校人所謂凡軍事物馬而頒之謂頒之官府  
卿大夫共軍事者耳其於民馬無預如曰以共六軍則

天子之馬一廐二百一十六匹良馬五種二千一百六  
十匹駕馬三之千二百九十六匹既欲以給郡吏又何  
以供六軍乎且以周之馬數合鄉遂不滿五千匹與王  
馬共得八千匹爾詩人歌宣王則曰其車三千三千則  
當萬二千匹不知宣王安得有此馬也蓋詩人歌詠言  
大槩爾未必果有三千車也衛人歌文公而曰駉牝三  
千駉牝果有三千乎魯人歌僖公而曰公車千乘公車  
果有千乘乎或曰天子萬乘當馬四萬足諸侯千乘當

馬四千匹卿大夫百乘當馬四百匹今言若是然則彼  
皆非歟蓋天子六軍指六卿也萬乘則合王畿千里言  
之大國三軍指三卿也千乘則合封疆五百里而言之  
大夫采地視子男卿采地視伯則百乘宜未為過也考  
之校人天子十二閑分為左右三千四百五十六匹邦  
國半天子之閑馬四種則三良馬居二廐六百四十八  
匹駑馬三之一種亦六百四十八匹并千二百九十六  
匹爾卿大夫二閑良馬一百一十六匹駑馬三之為六

百四十八匹并為八百六十四匹故家以實數言不啻  
百乘而侯國千乘天子萬乘是合言之凡此皆言馬乘  
之數爾然當疑之成周設官民馬之政特設馬質一職  
王馬之政乃有校人僕夫趣馬巫馬牧師廋人圉師圉  
人何其略於民牧而詳於王牧也蓋民馬民自備而自  
畜之其畜也則有司授之其用也則有司帥之王馬則  
自為牧廐不有數官分任其責則孰為之畜牧乎是故  
校人總馬政趣馬正良馬巫馬養疾馬牧師廋人則掌

牧閑圉師圉人則掌芻養然後校人春祭馬祖夏祭先  
牧秋祭馬社冬祭馬步豈特為王馬祭而不及民馬乎  
巫馬與醫合為一官雖特為王馬設亦豈聽民馬之自  
為豐耗而不設巫醫乎馬質之禁原蠶廋人之祭馬祖  
亦互言之未必重此而遺彼也抑嘗因是而觀周人牧  
馬之職牧人以中大夫二人為之趣馬而下皆上士中  
士下士先王以士大夫而任牧廐之寄不幾於太褻乎  
吁不如是不足以見馬政之重也天下事還須士大夫



為之趣馬得人周政以立蹶惟趣馬詩人刺之一趣馬  
之職而必為吉士之是用豈若後世一付之輿隸皂牧  
之手乎大抵馬政非得人則畜牧不蕃士大夫之心術  
不良則畜牧不蕃成周之士大夫皆德行道藝之選以  
德行道藝之人而隸師趣馭僕之職吾知其畜牧之必  
善矣不然衛人美文公駟牧之富何以曰秉心塞淵魯  
人頌僖公駟牧之盛何以歸之曰思無邪信矣馬政之  
蕃不可無士大夫心術之良也

# 火禁

周官水火皆有禁水親而不尊易以溺人川游之人狎于水者秋官萍氏禁之宜也火之有禁既有天官宮正以脩之又有秋官司烜脩之亦云足矣夏官司燿又特設一官以掌之何邪蓋火之為物炎上就燥尊而不親又非水之比也不得其齊則疾不得其性則災故火星之伏見有時國火之變易亦有時過焉為災此司燿所以因時而施令變火以救時疾也先鄭云三月昏心星

見辰上使民出火九月昏心星伏戌上使民內火春秋

傳曰以出內火夫出以季春內以季秋則是二時出入

火矣又曰四時變國火以救時疾何邪蓋季春出火非

出火於民也火星昏見司燿乃禮而出之猶義叔寅賓

出日也季秋內火非令民內火也火星昏伏司燿乃以

禮而內之猶和叔寅餞內日也二時之出內火星猶祭

祀之祭燿不忘本也曰民咸從之民亦如之亦令民知

有出內之禮也故宮正春秋以木鐸脩火禁以火星出

入而脩禁也司烜中春以木鐸脩火禁於國中為火星  
將出而脩禁也宮正特嚴宮中之禁司烜泛脩國中之  
禁故或以春秋或以中春有不同歟若夫四時變國火  
以救時疾則是順四時而改國火也鄭司農引鄒子之  
說春取榆柳之火夏取棗杏之火季夏取桑柘之火秋  
取柞櫟之火冬取槐檀之火是有五時變火此惑於五  
行五色之說也周人取火之制司烜惟曰以夫遂取明  
火於日以共祭祀而司烜實預國中之火禁則司燧四

時之變國火安知夫不以遂取火而易之乎取於日則  
為明火國火則不取於日爾語曰鑽燧改火是也然司  
燿上士二人徒六人司烜下士六人徒十二人安能盡  
變國中之火盡脩國中之禁毋亦司燿施其令司烜施  
其禁而使民自易之歟司燿司烜二官分屬夏官秋官  
者司燿行火南方之事故司燿隸於夏司烜取水火司  
寇奉明水火故司烜隸於秋抑嘗因火禁之脩官正司  
烜皆以木鐸脩之木鐸振文教者也文事奮木鐸武事

奮金鐸鼓人以金鐸通鼓司馬振鐸捫鐸奮武事也若  
非武事皆以木鐸徇之是以文教警衆不特脩火禁為  
然書曰每歲孟春道人以木鐸徇于路古人將有新令  
無有不奮木鐸者是以小宰帥治官之屬而聽治象之  
法則徇于木鐸小司徒小司寇帥屬觀象亦如之鄉師  
四時召令以木鐸徇于市朝士師左右刑罰以木鐸徇  
之于朝一木鐸之徇而人心皆知有文教之警則孰不  
脩職攷法以共王事奉令道禁以從王命哉

# 險固

聖人設卦觀象坎有重險之象故聖人彖之曰天險不可升也地險山川丘陵也王公設險以守其國險之時用大矣哉聖人守國豈不知固國不以山谿之險顧為設險之說以遺後世是豈恃險以為固哉蓋險者天地之所設聖人固不恃險以立國亦未嘗不因險而守國而其所以用險之道則大矣是故成周設官掌固一職掌脩城郭溝池樹渠之固而使士庶子及其衆庶守之

此掌王畿之固也司險一職掌九州之圖以周知山林川澤之阻設國溝涂而樹之林以為阻固皆有守禁此司天下之險也二官屬於司馬者蓋將謹固封守而預為備也其亦如萃之除戎器以戒不虞豫之重門擊柝以待暴客之義與昔者周公營洛且曰有德者易以興無德者易以亡周公初非恃險以立國也今也險固二官倚城郭溝池以為固視山林川澤以為阻蓋亦因其天地之所設而使之為守爾今以掌固考之城郭溝池



樹渠之固必脩也此守之必得地利也士庶子衆庶之  
守必頌也此守之必得人和也飾器之設材器之用  
是城守之具必備也財用之分稍食之均是兵食之財  
必足也役則必移守政必通恐其力之有不足則人得  
以乘其罅也晝必三巡夜必三鑿恐其守之不嚴則人  
得以投其隙也至於司險一官無事則通達其道路所  
以絕侯國負固之原有故則藩塞其阻路所以杜姦寇  
入侵之道周人之於守備必為是纖悉委曲者豈非以

形勢為不可專恃而守備為不可暫弛邪若夫周之所  
以守國者則又不專在是六典皆守國之法六官皆守  
國之人九畿有職則守在九畿四夷有衛則守在四夷  
三百六十屬之官無非周人所恃以守國者也如山林  
之有虎豹川澤之有蛇龍伏乎其中而凜乎其外國之  
險固孰有大於此者不然則山河魏國之寶吳起且知  
其在德不在險豈以周公之智而不及此哉

射儀

射有三一曰大射二曰賓射三曰燕射大射者梓人曰張皮侯而棲鵠則春以功註謂天子將祭必與羣臣諸侯射以作其容體合於禮樂者與之事鬼神是也賓射者梓人曰張五采之侯而遠國屬註謂諸侯朝會王張此侯與之射所謂賓射是也燕射者梓人曰張獸侯而王以息燕註謂燕勞使臣若與羣臣閒暇飲食而射是也案掌次賈疏曰天子大射六耦在郊賓射亦六耦在朝燕射三耦在寢此三射之所也射法射儀散見於六

官而射人則專掌之也說者謂射人主賓射而言然曰  
王大射曰王射則三射皆掌之矣今以他官考之司裘  
王大射則共虎熊豹三侯諸侯則共熊豹二侯卿大夫  
則共麋一侯皆射其鵠士射豸侯不言士侯以士不預  
祭故略之此射侯之別也樂師凡射王以騶虞為節諸  
侯以貍首大夫采蘋士采繁此射節之異也司弓矢天  
子之弓合九而成規諸侯合七而成規大夫五士三大  
射燕射共弓矢如數并夾此射弓之分也樂師則大射

令奏王夏騶虞燕射帥射夫以弓矢舞太師則大射帥  
瞽歌射節眡瞭則賓射奏鐘鼓鐘師奏射節笙師共鐘  
笙搏師鼓金奏車僕大射共三乏司常共獲旌掌次張  
耦次太僕王射則贊弓矢小臣賓射則掌事如太僕服  
不氏則贊張侯以旌居乏而待獲繕人則詔王射贊王  
弓矢之事太史則飾中舍算而射人與太史數射中大  
司馬合諸侯六耦而射人佐司馬治射正凡此皆分掌  
王射之儀法也射人一職乃正射位而詔射事以射法

而治射儀耦即掌次所張之次侯即司表所共之侯獲  
即司常所共之旌容即車僕所共之乏節即樂師所歌  
之節正即司馬所治之正而射人兼總之此周之射法  
然也然古人享諸侯必以射宴羣臣必以射蓋射可以  
觀德也內志正外體直其容比於禮其節比於樂故射  
中者可以觀其德之成射不中者必其德之有未全也  
豈徒視其巧之能中與其力之能至而已哉中庸曰射  
有似乎君子失諸正鵠反求諸其身一射之不中而反

身之學存焉此古人所以貴乎射也是故王與諸侯羣臣有大射燕射賓射之三禮至於教人之禮則有鄉射存焉鄉老五物之禮而射行焉鄉大夫保氏六藝之教而射寓焉州長州序之會民必會于射諸子國子之考藝必合諸射其教人也以射其取士也以射異時得與於祭得為諸侯皆由此其選也此豈與羿蒙由基之技可同日而語哉後世小學之制不存而五射之教無有鄉飲之禮可講而五物之儀不閑冠帶縉紳之流類以

張弓挾矢為甲冑之事雖曰上庠有矍圃之名殿庭存  
澤宮之制亦徒具虛文而已吾何以觀德哉

久任

司士掌羣臣之版歲登下其損益之數以詔王治而屬  
於司馬何也案王制曰司馬辨論官材論選士之賢者  
以告于王而定其論論定然後官之任官然後爵之位  
定然後祿之令司士曰以德詔爵以功詔祿以能詔事  
以久奠食此司馬論定而官任官而爵位定而祿之意



也以司士而屬司馬不亦可乎然司士之定稍食必以  
久何也蓋古人爵人以德不觀其暫而觀其常祿人以  
功不觀其驟而觀其素任事以能不揆其始而揆其終  
議論要諸久而後定功效要諸久而後成此先王所以  
久於任人而不驟遷也是故唐虞用人之法必三載而  
後考績必三考而後黜陟幽明皆久任也唐虞之官簡  
故九載而後黜陟成周之官衆故三年而誅賞愚於考  
課嘗言之矣今司士以久奠食又曰凡邦國三歲則稽

士任而進退其爵祿以三年為任官之定制而升降黜陟之法乃視此而為進退歟是法也不惟行於朝廷王畿而通行於天下都鄙矣所謂歲登辨其損益之數者鄭氏謂用功過黜陟非也羣臣之在仕版或老或少或貴或賤或多或寡各隨其歲而上下其數爾大宰雖曰歲終詔王廢置而羣吏之法亦必待三年之久然後大計而誅賞之吏治大計必以三歲故司士亦以三歲稽士任而進退其爵祿豈以一歲功勞而遽為遷轉之序

邪昔子產從政一年輿人謗而欲殺之迨至三年輿人  
誦而思嗣之方其謗而未誦也若驟去之雖子產亦無  
所施其技矣故孔子曰如有用我三年有成冉有曰比  
及三年可使足民要皆以三年而觀政也是故小司徒  
以三年而大比鄉老以三年而賓興州長以三年而贊  
廢興豈非以三年為中制而可以為賢能選舉官吏遷  
轉之敘乎然司士所掌者羣臣之版所稽者士任爾公  
卿侯伯有功德者初豈可以例遷乎周公為太師召公

為太保是則內而公卿蓋終其身而任也康叔之治殷  
民君陳之正周郊則是外而侯伯蓋老於國而任也豈  
若後之任於內者銖功勞以計進仕於外者寸歲月以  
希遷而已哉漢有歲中超遷至中大夫者有旬月取宰  
相封侯者官官隆秩可以驟致何其速也又有十年不  
得調者有三世不徙官者底僚下吏無以旌擢何其淹  
也故不待三年而驟遷者必有以起士大夫奔競之風  
有踰三年而不遷者必有以召士大夫淹滯之嘆有能

以司士三年稽任進退爵祿之法行焉庶乎可得而言  
矣

圖籍

土地有圖所以知天下地域廣輪之制人民有數所以  
知天下戶口登耗之由地官司司徒佐王安擾邦國則掌  
土地之圖與夫人民之數可也然職方氏亦掌天下之  
圖辨邦國都鄙夷蠻閩貉戎狄之人民與夫財用九穀  
六畜之數要而乃隸於夏官司馬司民亦掌萬民之數

自生齒以上皆出於版辨國中都鄙郊野異其男女歲  
登下其死生而乃隸之於秋官司寇其故何也蓋司馬  
辨邦政者也既有九法以平邦國又有九伐以正邦國  
又有九畿之籍以施政職又有四時之田以教民兵其  
所以謹固封守克詰戎兵者可謂嚴矣懷方氏又為之  
致貢物合方氏又為之達道路訓方氏又為之道政事  
形方氏又為之正封疆如此則職方氏得以土地之圖  
而辨九州之地使同貫利而九服之制乃得而辨焉則

以地圖之掌而隸於夏官宜也司寇掌邦刑者也既有  
三典詰四方五刑糾萬民又有兩造禁民訟兩劑禁民  
獄又有嘉石平罷民肺石達窮民其所以愛惜民命不  
輕刑殺者亦云至矣小司寇又為之登民數鄉士又為  
之掌鄉數遂士又為之掌遂數縣士又為之掌縣數如  
此則司民得以生齒之版而登萬民之數歲登下其死  
生而三年大比乃得而獻焉則以民數之掌而隸於刑  
官宜也大抵夏官政職本以正封疆封疆不正始不得

已而用兵秋官刑典本以禁暴亂暴亂不禁始不得已而用刑政官不知有土地之圖則不謹固封守刑官不知有人民之數則不知愛惜民命雖有司徒掌教之職而欲以土地之圖人民之數以佐王安擾邦國得乎且如掌地圖者不止一二職也司書掌邦中之版土地之圖內宰掌書版圖之法遂人掌以土地之圖經田野土訓掌道地圖以詔地守司險掌九州之圖此皆掌地圖之官也民數不惟鄉士遂士縣士掌之如小司徒則稽



人民之數閭師則掌民人之數縣師則辨人民之數此  
皆掌民數之官也然地圖則分掌之而已至於民數則  
猶極其詳焉小司寇曰三年大比登民數於天府內史  
司會冢宰貳之以制國用又曰孟冬祀司民獻民數于  
王王拜受之以圖國用而進退之司民亦曰獻其數于  
王王拜受之登于天府內史司會冢宰貳之以贊王治  
一民數也國用之豐耗繫焉王治之興廢繫焉數官掌  
而辨之可也三官貳而圖之可也然必拜而受之如受

賢能之書登于天府與司寇獄訟之登中者而與祖廟  
寶器俱藏焉以此見民數之與刑中皆同天物其愛民  
恤刑之意蓋常相關也以刑官登民數以天子拜民數  
以天府藏民數猶足以見周人重民之意歟

地理

古者言九州者三禹貢之冀兗青徐揚荆豫梁雍夏制  
也爾雅之冀幽營兗徐揚荆豫雍商制也職方之揚荆  
豫青兗雍幽冀并周制也商有幽營而無禹貢之青梁

周有幽并而無禹貢之徐梁此三代九州之不同也爾雅何以知其為商制以郭璞詩云也賈氏乃謂之夏制蓋以詩譜所謂梁雍荊豫徐揚之民被文王之化文王當商之末有雍梁之名爾雅無梁州則不可為商制不如鄭譜但言文王三分天下有其二州名不足憑也若以爾雅為夏制則禹貢當為何制乎然爾雅有九州之名無九州之界而禹貢職方之界有相侵者請得而言之且職方冀州視禹貢為小以分冀為幽并如舜時制

是一分而為三也雖無徐州而青兗之間是已雖無梁州而雍豫之間是已禹貢曰海岱及淮惟徐州又曰大野既豬今職方青州之川淮泗兗州之澤大野是以徐而入青兗可知矣禹貢曰華陽黑水惟梁州又曰厥貢璆鐵銀鏤砮磬今職方豫州之山華山雍州之利玉石是以梁而入於雍豫可知矣職方既以青兗而包徐故青州多入禹貢之豫兗州多入禹貢之青禹貢豫州曰被孟豬而職方青州曰其澤望諸豈非青之入豫乎禹

貢青州曰鹽絺海物而職方兗州曰其利蒲魚豈非兗  
之入青乎職方既分冀而為幽并故幽州多入禹貢之  
青徐冀州多入禹貢之雍職方曰幽州其山醫無閭醫  
無閭在遼東漢先以遼東屬青州後又屬幽州茲非幽  
之入青乎職方曰幽州其澤獫狁其浸菑時獫狁養在長  
廣菑出萊蕪地里志以長廣屬徐州琅邪自萊山茲非  
幽之入徐乎職方曰冀州其澤楊紆爾雅謂秦有楊紆  
李淳以為在扶風茲非冀之入雍乎大抵周以禹之一

冀州分而為三以禹之八州合而為六其勢必不能如禹之舊杜氏與二鄭不本此說不改職方之字則改職方之意後鄭以潁宜屬豫澁宜屬荆不知幽青雍梁兗豫尚多侵入沈荆豫相距之州乎改其意而釋者此也先鄭以青之淮字當為睢沭當為沭直謂宋有次睢魯有沭泗曾不謂青之包徐也先鄭謂雍之弦當為汧蒲當為浦直謂雍有汧水曾不謂吳山在汧而有弦蒲之數杜氏以荆之湛當為淮後鄭以充之盧維為雷雍直

以湛與盧維無所經見曾不謂地名變易不一不可一  
一知也改其字而釋者此也至如山鎮藪澤又有可得  
而辨者九州山鎮分言之則曰四鎮五嶽總言之皆曰  
山鎮揚之會稽青之沂山幽之醫無閭冀之霍山固為  
四鎮矣而五嶽在虞夏商周與漢世有不同舜典南嶽  
孔安國以為衡山職方曰山鎮曰衡山是衡為南嶽明  
矣而爾雅有二說河南衡山為南嶽又以霍山為南嶽  
蓋漢武帝元封五年巡南郡禮天柱山號曰南嶽是以

衡山之神遼遠又移其神於霍山也說者謂一山兩名則失之此漢獄之與虞周不同也王制有恒山衡山而不言太華嵩山舜典有四嶽而不言中嶽蓋王制南北以山為至東西以水為至故五嶽言其二舜典言四方巡守所至之地故五嶽言其四泰山為東嶽華山為西嶽恒山為北嶽衡山為南嶽嵩山為中嶽嵩高太室也即禹貢之外方也初無嶽山之名職方山鎮有恒有岱有華有衡不言嵩高而有嶽山蓋周都在五嶽之外故



以雍之吳山為嶽山此周嶽之與虞夏商不同也故曰  
山鎮之有可辨者此也九州澤藪在職方為九在爾雅  
為十蓋職方以州言爾雅以國言也爾雅以吳越有具  
區即此揚也楚有雲夢即此荆也鄭有圃田即此豫也  
宋有孟豬即此青也魯有大野即此兗也秦有楊紆即  
此冀也燕有昭餘祁即此并也此藪澤之名同也獨晉  
之大陸齊之海嵎周之焦穫爾雅與職方不同然爾雅  
之濟即職方之幽以其幽之澤藪獫狁養而獫狁在徐也

爾雅之燕為職方之并以其并之昭餘祁而燕為幽州也爾雅之周為職方之雍爾雅之秦亦為職方之雍職方既以弦蒲為雍所以不受焦穫爾雅之晉為職方之冀職方既以冀之界入於秦以楊紆為冀所以不受大陸此澤藪之名異也故曰澤藪之可辨者此也然嘗考之禹貢之別九州隨山濬川而終之曰庶土交正底慎財賦咸則三壤成賦中邦故夏書謂之禹貢今職方之辨九州制畿封國而終之曰制其職各以其所能制其

貢各以其所有故周官謂之職方氏鄭氏曰職主也主  
四方之職貢者其知成周設官之意乎周人設官以職  
貢為名而制貢又曰各以其所有此正禹貢任土作貢  
之意也不原周人設官制貢之意而徒區區於九州山  
川之辨是持一地理書爾而於治道何益

### 刑罰

觀舜命皋陶鑿夷猾夏寇賊姦宄皆以為明刑之責今  
周官既以大司馬掌兵又以大司寇掌刑是以兵刑分

而為二也蓋大刑用甲兵小刑用刀鋸甲兵以威蠻夷  
猾夏者刀鋸以威冠賊姦宄者虞之官簡周之官衆故  
以司馬掌兵司寇掌刑二者並行而不相悖歟且以刑  
官之屬自小司寇而下至禁暴氏其為職事亦詳矣曰  
墨曰劓曰官曰剕曰殺此刑之有五罪也曰官曰官曰  
國曰野曰軍此刑之有五禁也曰誓曰誥曰禁曰糾曰  
憲此刑之有五戒也曰辭曰色曰氣曰耳曰目此刑之  
有五聽也然刑者例也例者成也一成而不可易故君

子盡心焉淺深之必測輕重之必論必原其情必權其義初豈徒法之是任邪是故舊染方新必以柔克乂之故曰刑新國用輕典暴亂不馴必以剛克乂之故曰刑亂國用重典教化已明習俗已成必以正直乂之故曰刑平國用中典此刑典隨時而為輕重也司寇以五刑之法詔刑罰而辨罪之輕重此詔刑而審輕重也司刺以三法求民情斷民中而施上服下服之刑此訊刑而度輕重也掌囚掌守盜賊凡囚者上罪桎梏而桎中罪

桎梏下罪梏此因刑而量輕重也以嘉石平罷民弗施  
刑也而且有重罪次罪下罪之別此非坐而役之亦察  
輕重乎以園土教罷民不虧體也而且有上罪中罪下  
罪之分此非收而教之亦測輕重乎蓋刑者所以教中  
也權其輕重所以取中也司刺則曰斷中士師則曰受  
中小司寇則曰登中無非以中用刑也然為政而必至  
於用刑豈聖人之得已哉姦慝必詰暴亂必刑非刑無  
以格其非心而使之遷善遠罪政官之後繼以刑官先

王豈得已哉臯陶作士舜必告之以刑期無刑康叔司  
寇成王必告之以辟以止辟如必察察焉以治獄聽訟  
為能事是非王政之所尚也是故司寇掌刑之官以五  
刑糾萬民吾意其必用刑罰也今也野刑則上功糾力  
軍刑則上命糾守鄉刑則上德糾孝官刑則上能糾職  
國刑則上愿糾恭不施其刑而惟功命德能愿之是上  
不察其罪而惟力守孝職恭之是守曰上者開其善而  
使向慕也曰糾者糾其過而使歸正也初何心於用刑

乎以八辟麗邦法附刑罰吾意其必施刑罰也今也議親議故有辟議賢議能有辟議功議貴有辟議勤議宥有辟以八辟之當刑固不可徇情而違法以八辟之當宥又不可記過而忘功麗於法者不出於私情附於刑者實在乎公議初何心於用辟乎此猶曰刑不上大夫士節不可不厲也至於萬民之有獄訟者司寇必思有以禁止之兩造具備使入束矢於朝取其辭之直而後聽之所以禁民訟兩券俱至使入鈞金於朝取其信之



堅而後聽之所以禁民獄豈非使民無訟者乎萬民之  
麗刑罰者士師必先有以佐助之以五禁左右刑罰徇  
之于朝而又垂于門閭使之知所禁止也以五戒先後  
刑罰用之於其所而使無麗於罪使之知所警戒也此  
非刑期無刑者乎大司寇正月則垂刑象而使觀小司  
寇正歲則帥官屬而憲刑禁士師正歲則帥其屬而憲  
禁令布憲則以正月之吉執旌節而憲刑禁又有禁殺  
戮之官禁暴民之官禁其殺止其暴惟恐斯民之陷乎

罪也及其陷乎罪也司刺則訊之羣臣又訊之羣吏又訊之萬民必其左右大夫與諸國人皆曰可刑然後刑之如吏民以為不可刑小則宥之大則赦之宥之則以其不識過失遺忘也赦之則以其幼弱老耄蠢愚也至於死刑之不可免也而猶欲免之鄉則王親會其期遂則王命三公會其期縣則王命六卿會其期會其期欲合衆議而免之也此非辟以止辟者乎詳觀司寇數官大抵恤刑之意多而用刑之意少施刑之語略而免刑

之意詳故大司寇一官雖曰掌刑不言掌邦刑而曰掌  
邦禁成王周公亦如之則其設官分職之意蓋以刑禁  
民而非以刑刑民也雖然禁民以刑者固可遏其惡於  
未萌導民以教者斯足以格其非於無過書曰明于五  
刑以弼五教又曰勿庸殺之姑惟教之是先王先有以  
教之於其始而不待禁之於其終也教官之屬司諫一  
職糾其德而勸之朋友正其行而強之道藝是有以驅  
民於善也驅之於善則有德行道藝之可書國事有能

之可任而廢置可得而詔赦宥可得而行司救一官表  
惡過失則誅之以禮防禁而救之是又有以懲民於惡  
也懲之以惡則有表惡者三責而後罰三罰而未恥則  
以嘉石坐之有過失者三責而後罰三罰而未改則以  
園土納之先王始拳拳於教官之救諫而後凜凜刑官  
之詰禁況大司寇之職嘉石則曰平罷民園土則曰聚  
教罷民司園一職亦曰收教罷民任之以事而收教之  
不惟教之於未犯刑之先而且教之於既麗刑之後是

雖國有五刑而未嘗輕用之也然嘗疑周公制刑五刑之法各五百凡二千五百屬穆王訓夏贖刑五刑之屬三千穆王為周子孫周公之刑果輕其欲祥刑則守周公之法可也然夏刑三千而死罪二百周刑二千五百而殺罪五百周之刑為重矣周公制刑之仁反不若穆王訓刑之仁哉班固乃以司刑二千五百為中典呂刑三千為重典以周刑為中典猶可豈有夏之死刑僅二百爾而可為重典乎孔子曰五刑之屬三千蓋見穆王

之刑為言也而周公乃有二千五百者豈非刑罰世輕  
世重乎蓋五刑肉辟也肉辟之用虧人形體聖人誠有  
甚不得已也惟其不得已而用肉刑也於是乎有每降而  
為輕刑五刑以象之五流以宥之流宥不足降而為金  
贖金贖不足降而為鞭扑鞭扑不足又降而為肆赦如  
此則肉刑之用亦希矣況職金掌受士之金罰則刑之  
有贖可知矣司厲曰其奴男子入於罪隸則刑之有流  
可知矣條狼氏之誓曰鞭猶鞭刑也司市之罰曰扑亦

扑刑也其有可赦者則司刺有三赦三宥之法在焉必不得已而用五刑死者猶欲免之墨者且使守門劓者且使守闕宮者且使守內劓者且使守圜髡者且使守積而各以其罷食之雖五刑之罪各五百輕者常見其輕重者亦不見其為重也以此見肉刑之法自唐虞三代以來相承而不敢廢者正以寓人主不忍用刑之仁也自文帝除肉刑而定笞令後世人主始有輕用刑之心彼其感一女子一時之言而輕變數聖人千百載之

法是豈舜禹臯陶成王周公之智反不若一女子之智  
舜禹臯陶成王周公之仁反不及文帝之仁邪故曰肉  
刑之刑刑也雖然肉刑所以濟乎治也井田所以立乎  
治也封建所以行乎治也秦漢以來井田廢而阡陌封  
建易而郡縣先王之制掃地迨盡而獨肉刑存焉是忽  
其所立廢其所行而徒恃其所濟以毒天下則其變而  
為笞箠亦宜矣不井田不封建皆置不問而徒曰不肉  
刑則不足以行周公之道是豈為知本之論哉



# 詛盟

穀梁子曰詬誓不及五帝盟詛不及三王愚謂五帝非無詬誓也而後之詬誓則不及五帝之時三王非無盟詛也而後之盟詛則不及三王之時蓋虞氏未施信而民信夏后氏未施敬而民敬商人作誓而民始叛周人作會而民始疑商人且爾他可知也故曰詬誓不及五帝會尤惟始作亂苗民弗用靈民興胥漸泯泯焚焚罔中于信以覆詛盟苗民且爾他可知也故曰詛盟不及

三王今周官有詛祝有司盟先正橫渠亦嘗疑之以為

王法不行人無所取直故要之於神決非周公之意亦  
不可以此病周公之法又不可以此病周禮夫既不以  
盟詛病周公之意而又曰不可以此病周公之法蓋周  
公立法非為當時慮為後世慮也周公知時變之不可  
回人情之不可遏故事為之制曲為之防如韁馬隄川  
庶其無奔踰濫溢之患雖其奔踰濫溢有不可遏不猶  
愈於壞隄徹韁乎詩云侯詛侯祝靡屆靡究君子屢盟

亂是用長周公逆知後之必至此也是故詛祝有官掌作盟詛之載辭以敘國之信用以質邦國之劑信司盟有官掌盟載之法與盟約之禮儀邦國之有疑會同者則北面詔明神盟萬民之犯命者詛其不信者有獄訟者使之盟詛焉夫所以盟詛者獄訟一也有疑會同二也萬民犯命不信三也有是三事而盟詛焉則詔之於明神歆之於牲血祈之以酒醕約之以載辭亦期於相信而已故詛祝盟詛之辭亦惟敘信用爾曰質劑信爾

此所以先結其信於未叛之前也既盟詛矣而又有不信者則司約如所掌若有訟者則珥而辟藏其不信者服墨刑若大亂則六官辟藏其不信者殺也又以太史所掌邦國官府都鄙辨法者考焉不信者刑之六官之所登若約劑亂則辟法不信者刑之也此所以繼施其刑於不信之後也豈有王法不行人無所處置而姑一聽之神邪且以詛祝一官固為禮官之屬而在大史之前司盟一職是為刑官之屬而繼於司約之後是其始

馬之不信者固有盟終焉之不信者則有刑也不然則  
大司寇凡大盟約泣其盟書登于天府以司寇而泣盟  
書以天府而藏盟書亦已重矣又何以使太史內史司  
會及六官皆受其貳而藏之何邪昔展禽有言曰周公  
太公股肱王室成王勞而賜之盟曰世世子孫無相害  
也載在盟府太史職之周公太公固無待於盟載然後  
人必以盟而為據則人心之賴盟者亦固矣迨至春秋  
之時斯盟替矣春秋之作始於隱公元年所書未遑他

事首之以邾之盟繼之以宋之盟自時厥後有書來盟有書泣盟有書同盟然盟墨牲血之未乾使聘邦交之未反而相侵相伐之兵已環四境是盟也果有信用之敘果有劑信之質否乎觀周禮之司盟而知世變之猶可防觀春秋之書盟而嘆世變之不可遏故嘗謂周公立法為哀世慮而孔子作春秋亦所以救周禮之壞而拯世道之窮不獨誚盟一事為然也田制壞而春秋以稅畝田賦書軍賦壞而春秋以丘甲三軍書三日之役

不均而春秋以城築書九伐之法不正而春秋以侵伐

書講武之田不時而春秋以大蒐大閱書救荒之政不

施而春秋以大饑請糴書宗伯之賓禮廢而春秋有來

朝來聘之書司徒之封疆廢而春秋有歸田易田之書

太史之告朔不頒而春秋書不視朔司烜之火禁不脩

而春秋書宣榭火保章失其官而春秋書日食書星孛

職方失其官而春秋書彭城書虎牢圜丘之祀不典而

春秋以卜郊書以猶望書廟祧之序不明而春秋以立

官書以躋祀書昏姻之禮失而春秋書曰夫人于齊曰  
季姬歸鄆貢獻之禮失而春秋書曰家父求車毛伯求  
金典命之職不脩而春秋書曰天王使來錫命天府之  
藏不謹而春秋書曰盜竊寶玉大弓此類實繁未易殫  
舉無非以權衡一字之微而救禮經三百之壞也周公  
慮後世之深於是乎詳曲防之制孔子救後世之力於  
是乎嚴直筆之書世道盛衰實賴二聖人先後為之維  
持也不然孔子何拳拳於周公之夢而戚戚於周公之



哀歟

鳥獸

觀天官獸醫一職凡獸有病瘍者為之療養有以見先  
王養物之仁蓋仁者以天地萬物為一體牛羊犬馬之  
類一有不遂其生皆吾痒疴疾痛也其可坐視而不恤  
也哉不特此耳地官之辨物生必求其鱗介羽毛羸物  
之得宜春官之作樂舞必求其鱗介羽毛羸物之有所  
致數牧必求其鳥獸之阜土地必求其鳥獸之蕃至於

奉養有不可闕者則獸人以時田獸魚人以時田魚鼈人以時簪鼈推是心也以往則為舜之恩被動植湯之德及禽獸禹之鳥獸魚鼈咸若文王之德及鳥獸昆虫皆此心也然而夏官之屬掌養猛獸而教擾之則有服不氏掌養鳥而阜蕃教擾之則有掌畜射鳥毆鳥鳶則有射鳥氏作羅羅鳥鳥則有羅氏不特養而擾之又必射而羅之何邪秋官之屬冥氏攻猛獸庶氏除毒蠱穴氏攻蟄獸翬氏攻猛鳥哲族氏以方書去夭鳥翦氏以

禁莽草除蠹物赤友氏以灰炭除狸物蠃氏以牡藷去  
鼃龜壺涿氏以牡槁象齒殺淵神庭氏以救日月之弓  
矢射天鳥不曰除而去之則曰攻而殺之何邪蓋奉養  
有節而不忍暴殄天物者先王愛物之仁患害必除而  
不使紛擾民居者先王制物之義先王之於民物必使  
之相安而後得其所必使之相生而各遂其宜苟有猛  
摯而不馴大惡而不利者此先王刑政之所不容也是  
故夏官掌政而以服不氏等官隸之以見鳥獸之微雖

非政令之所及而有惡必去焉不獨侵負固正賊殺之  
民而已秋官掌刑而以冥氏數官隸之以見昆蟲之微  
雖非刑罰之所加而有害必除焉不獨詰姦慝刑暴亂  
之民而已說者則曰夏為養育之時故養育者屬夏官  
秋為刑殺之時故刑殺者屬秋官然而射鳥羅鳥豈皆  
養育之事乎秋官閩隸則掌役養畜鳥而阜蕃教擾之  
貉隸則役服不氏養獸而教擾之是秋官未嘗不養育  
也觀此則刑政之說明矣當觀孟子言禹抑洪水而及

於驅龍蛇言周公蕪夷狄而及於驅猛獸且與孔子之  
作春秋而亂臣賊子懼者並言之乃知鳥獸之為民害  
與洪水夷狄亂臣賊子同周公於百姓既寧之後明政  
刑於閒暇之日安得不為天下無窮之慮哉周衰而政  
刑失先王興利除害之意已不復存服不氏廢則冬多  
麋矣壺涿氏廢則秋有戴矣哲族氏廢則鸛鵒來巢矣  
射鳥氏廢則爰居有祀矣蓋其刑政不明是不足以弭  
民人之害而況能消鳥獸昆蟲之患邪漢有一宋均能

去九江之虎唐有一韓愈能馴潮陽之鱷魚則當時以  
為創見罕聞之事獨不見禹之驅龍蛇周公之治猛獸  
與周官之政治鳥獸昆蟲者哉

遣使

嘗讀詩至四牡皇華見周人以遣使為重事其遣之也  
歌皇華其勞之也歌四牡遣詩言送以禮樂勞詩言有  
功而見知夫遣使以循行天下本何功之可言況又求  
人君之見知邪然詩人且先勞詩而後遣詩者蓋為民

遣使非徒為禮樂光華而為美觀也生靈之休戚國家  
之利病風俗之美惡皆使者所當究心者焉驅馳之勞  
咨詢之博苟有功於其民而見知於其君則人君必因  
使者之來而知究心於民事矣苟不見知則使臣之遣  
也為虛文使臣之行也為應故事其來也敷同日奏罔  
功而已而於事何補哉今觀周禮一書無非究心民事  
而於遣使一事必致其詳典瑞則有珍圭牙璋穀圭琬  
圭琰圭之瑞掌節則有虎節人節龍節英蕩之節此使

臣之所持以為信者也若以書使於四方書其令則外  
史掌之凡國之使者共其幣馬則校人掌之此史臣之  
所將以為命者也作士適四方使為介則司士掌之適  
四方使從士大夫則虎賁氏掌之此使臣之所藉以為  
伴也訓方氏則掌道西方之政事與上下之志匡人則  
掌達法則匡邦國而觀其慝揮人則掌誦王志道國之  
政事以巡天下之邦國而語之行夫凡其使也必以旌  
節使則介之掌交則掌以節與幣巡邦國之諸侯而道



王之德意志慮此皆奉王命而使於四方者也小行人  
一官固待四方之使者而王有事適四方則小行人實  
行焉夫行人之適四方也豈徒達六節而齊以為式邪  
豈徒成六瑞而執以為信邪又豈徒合六幣而和以為  
好邪曰札喪則賻補之凶荒則賙委之師役則槁襚之  
福事則慶賀之禍哉則哀弔之凡此五物者治其事故  
則小行人奉命以往者無非究心於邦國之民事也及  
其萬民之利害為一書其禮俗政事教治刑禁之逆順

為一書悖逆暴亂作慝猶犯令為一書札喪凶荒貧厄  
為一書康樂和親安平為一書凡此五物者每國辯異  
之以反命於王以周知天下之故則小行人反命以告  
者亦無非究心於邦國之民事者也觀小行人奉命以  
往之日與夫反命以告之時拳拳以民事為重則其周  
爰咨諏周爰咨詢者亦可謂詳緻矣豈若後世之朝辭  
禁門情態即異莫宿州縣威福便行者可同日語哉故  
曰觀周禮行人之職則知周之遣使者為究心於民觀

小雅皇華之詩則知周之奉使者為有功於民

夷狄

司馬言九畿其外曰蠻夷藩鎮是天下封疆極四夷也  
職方言九服其外亦曰蠻夷藩鎮是四夷皆服事天子  
也夷鎮藩服在行人總謂之蕃國蠻服在行人變謂之  
要服是要荒無常也且以職方地圖觀之言邦國都  
鄙而不及於四夷八蠻七閩九貉五戎六狄之人民如  
此則周家疆理通乎蠻夷閩貉戎狄矣行人何以謂之

九州之外乎案王制謂西不盡流沙東不盡東海南不盡衡山北不盡恒山凡四海之內截長補短凡三千里說者謂言九州之實地也今職方九州之地荊州曰衡山并州曰恒山則是盡東西南北言之矣而行人謂蕃國在九州之外者以其在六服外而非九州內地爾夫既在九州之外則其朝貢不常宜其一世以見而不及以中國之政也然周人所以待夷狄者豈以不在內地不及以政而盡置之度外乎夏官懷方氏掌來遠方之

民致方貢遠物而送迎之治其委積館舍飲食則是待  
夷狄之民猶吾民也秋官象胥掌蠻夷閩貉戎狄之國  
使傳王言而諭說焉以和親之若以時入賓則協其禮  
與其辭言傳之則是待夷狄之使猶中國使也不特此  
爾韎師掌教韎樂施人掌舞夷樂鞀鞀氏掌四夷之樂  
與其聲歌祭祀燕享則敔而歌之是以夷狄之樂舞與  
中國之樂舞並陳於祭祀燕享之時矣司隸帥四翟之  
隸使服其服執其兵掌王宮蠻隸執兵以守王宮閩隸


掌立世子則取隸夷隸貉隸則守王宮如蠻隸之事是以夷狄之兵衛而與王宮之兵衛共列於門庭宮禁之內矣夫遠民之來固宜有送迎之官遠使之至固宜有傳諭之官若夫歌舞雜施於燕享豈能無耳目之眩兵服混處於守衛豈能無肘腋之虞漢安帝作西南夷樂而陳禪爭之唐玄宗作潑寒胡戲而張說爭之誠以夷樂之不可以亂華也宣帝金城之處降而殘羗猶為患光武玉門之謝質而侍子必遣還誠以邊釁不可妄開

也而周人不慮及此何哉蓋王者洽四海以為和作夷  
樂以燕享所以說遠人天子合四夷以為守帥夷兵而  
守衛所以柔遠人古人雖亦知其飲食之互異語言之  
不同而其所以待之之心未嘗不厚也此夷狄所以懷  
德慕義而莫敢不來王也與雖然先王亦未嘗汲汲於  
夷狄之來王也懷方氏之來遠民其貢物則曰致致者  
聽其貢物之自致也象胥之諭夷狄其和親則以言言  
者欲其志慮之相孚也西旅獻獒召公作誥巢伯來朝

芮伯旅命周家法也此懷方氏之所以致遠象胥之所  
以和親是為周家待夷狄之法與知懷方氏之致物則  
張騫之使不必通廣利之師不必遣矣知象胥之和親  
則婁敬之議不必行而賈誼之策不必施矣



# 九畿圖



補亡

六經更秦火缺裂而不全者多矣書亡四十三篇周雅  
亡六篇魯雅亡六篇不獨周禮為然夫秦人之心何心  
哉已則不行先王之道而恐天下後世之人執經以議  
已故取聖經而寘之烈焰使後世不及見全書安得不  
追仇於秦火之酷雖然六經無全書固可以為秦人之  
罪而周禮一經不得其全不可獨咎秦人也蓋自王道  
既衰伯圖迭起入春秋以來周公之禮雖不盡用而猶

可盡傳周禮之經雖不盡行而猶可盡見戰國暴君汚吏將欲肆其所為以求遂其所欲惡其害已而去其籍故至孟子之時井田之問爵祿之問孟子已不得其詳戰國諸侯之酷蓋已先秦火矣漢室龍興山巖屋壁之間稍稍閒出周禮六官缺一而五存天之未喪斯文亦幸矣河間獻王得之不啻如獲圭璧不吝千金重賞募求金書獻王之意厚矣然金書竟不可致獻王悵之乃求考工記以足其書謂可以備周官之缺不知以考工

記而補周禮何異拾賤醫之方以補盧扁之書庸人案之適足為病五官尚存武帝且以為末世瀆亂不驗之書則武帝之忽畧聖經未必不自考工記一篇啟之也嗟夫書亡而張霸偽書作詩亡而東哲補詩作適資識者一捧腹爾曾謂考工記而可補禮經乎且百工細事爾固非周官所可無而於周官設官之意何補又況秋官有典瑞玉人不必補可也夏官有量人匠人不必補可也天官有染人鍾氏愰氏雖缺何害乎地官有鼓人

鮑人韞人雖亡何損乎雖無車人而巾車之職尚存雖  
無弓人而司弓矢之職猶在匠人溝洫之制已見於遂  
人鼓人射侯之制已見於射人有如攻皮之工五既補  
以三而又缺其二不知韋氏喪氏豈非天官司裘掌皮  
之職乎周禮無待於考工記獻王以此補之陋矣大抵  
獻王之補亡也漢儒之習未脫也樂記一篇欲以補樂  
書之闕考工記一篇欲以補禮書之亡獻王之見然爾  
然而周禮廢興有不係是昔者仲孫湫來省魯難退而

曰魯秉周禮未可動也且魯當春秋之時非能盡秉周禮者也然於周禮雖未能盡用苟未至於盡亡而亦可以立國周禮六官雖缺其一不猶愈於盡亡乎後世誠能因五官之存而講求周禮之遺典而施行焉則西周之美可尋矣而況冬官之書雖亡冬官之意實未嘗亡也太宰事典以富邦國以任百官以生萬民小宰事職以富邦國以養萬民以生百物則事官之意在周禮可考也書之周官亦曰司空掌邦土居四民時地利則司

空之意在周官可覆也觀此則司空職雖亡而未嘗亡  
考工記不必補也愚既以考工記為不必補則區區百  
工之事亦不必論也

禮經會元卷四下



附錄

竹埜先生傳

先生諱時字秀發系出縉雲葉氏上世宦遊浙右樂錢塘風土因家焉祖仲元祐紹聖間副臺端偕劉摯孫覺奏雪熙寧以來刑獄坐是鵠秩訴理黨先生幼孤力學淳熙甲辰進士及第授奉國軍節度推官轉兩浙運司幹辦公事出知龍泉縣有美政特旨典行在糧料院遷太常簿祕書郎輪對上疏謂當法祖宗蘇民瘼無專財

賦兼吳興郡王府教授尋除祕書丞擢監察御史首論士大夫風俗廉恥不立而躁競相先職業不脩而苟且是狗會權臣韓侂胄欲開邊擅兵柄言者多獲罪先生嘆曰奉職不稱無以塞責忍固位以忘君乎彊爭其不可者有四一曰天時未順二曰民力未紓三曰在彼未在必亡之形四曰在我未有必勝之實天子以為然而勢莫遏也已而兵果弗利吳曦反於蜀詔討之復疏誅賞不當罪功者遷殿中侍御史又遷右諫議大夫首奏

倖門四闕名器日輕尉府崇階及於族黨之無功節鉞  
異數畀之刀筆之小吏奴隸膺總戎之寄婢妾冒郡國  
之封反道敗紀人心憤鬱侂冑尋誅又謂侂冑專政無  
君罔上不道乞梟首置之淮甸積屍叢塚之間以謝天  
下上納之除權禮部尚書兼侍讀又權吏部尚書歲閔  
雨論天人相與之道甚悉繼以立朝久乞郡以華文閣  
學士知泉州改福建安撫使知福州又加徽猷閣學士  
知婺州移潭州具有惠政先是潭有峒寇甚為民患先

生泣之人不識寇授工部尚書會皇嗣未建乞遷宗籍  
以繫天下之望於是濟王竝正位儲極加修玉牒兼侍  
讀遷吏部尚書星變海決疏謂得人力乃可以得天心  
又論治內治外莫先於固邦本振國威上欣然嘉納繼  
以年至願乞骸骨上曰天官經筵賴以資朕不德詎宜  
輕舍去邪理宗即位以顯謨閣學士知建寧府政成告  
老授寶文閣學士提舉西山崇福宮又進龍圖閣學士  
光祿大夫致仕以薨贈開府儀同三司爵南陽郡開國

公食邑二千一百戶食實封一百戶葬吳興斗山謚文  
康先生踐履端澄臨事警敏明性命道德之學與紫陽  
朱文公相友善尤粹於周禮晚居嘉興著禮經會元授  
門人三山翁合號竹堊愚叟學者稱為竹堊先生咸淳  
六年文及守嘉興建竹堊書堂於春波門嘉興杭州三  
學皆立祠祔祀



先生開府禮經會元四卷凡百篇錯綜六官剖括羣  
務其於建邦立極敦禮崇樂之要靡不該洽今讀其  
文如立文武成康之朝以與周召畢榮相唯喏也其  
書昔授門人丹山翁同父氏自翁氏復歸家櫝比年  
兵革流冗躬負遺笈得不失墜江浙右丞榮陽公敦  
古尚治命鋟梓以不朽其傳噫聖人之道具於六經  
聖人之治實存周禮先公以直氣正學剔厯清要會  
權臣革命僅自法從出典外藩而志不盡施則會元

之傳以俟後聖者固有在矣豈徒資學子討論之益哉讀者其毋忽至正二十五年八月吉日六世孫將仕郎江浙等處儒學副提舉葉廣居百拜謹識




謹案第二頁後二行王食其一而受賞者食其二  
刊本食訛禽今改

第二十二頁後七行兗州多入禹貢之青刊本青  
訛者今改

第三十五頁前三行以司寇而涖盟書刊本書訛  
持據大司寇職改

第三十九頁前六行壺涿氏廢刊本涿訛涿據周  
官改





覆校官編修臣茅元銘

校對官檢討臣龔大萬

膳錄監生臣杜成